

1 Timoti

Pâlaŋ Timoti egat zapat meluwaŋ ñejaŋ kumti saye

Pâlaŋ zapat meluwaŋ kapi kuye yaŋgut sekamaŋ ñen kuye. Zapat meluwaŋ notnaŋ kukŋaŋgat tapmeliwen ke egaŋ dapmelaŋge mka ma msat dende keyet kumindadaŋaŋ. Âpme Timotiyet kuin kapi zapat meluwaŋ an kwepgat kuye yaŋgut zet keyet keŋaŋ tazin ke am sambe ñep makumti winde titiyelen. Pâlaŋ mka katikŋan ku tati zapat meluwaŋ kapi kuye yek; egaŋ zupman mamti kuye.

Timoti ek Pâlaŋ mulup annaŋ mtetime mulup ilitsakwep mmebun. Timotiyet mamaŋ Zuda mangeengatnaŋ âpme bipmaŋ Glik an (Nembayelen Muluwin 16:1). Pâlaŋ Kawawaŋgalen Zet Zapat Dolakŋaŋ Penaŋ ñejaŋ timegeen Timoti nâmkîŋpepe aige (Nembayelen Muluwin 14). Bamgat Pâlaŋ ekmak mamayelen ombempeye (Nembayelen Muluwin 16). Pâlaŋ Timoti peme ikŋak mepmamti mulup mge keyet zemgwaŋnaŋ zet kapi kumsaye. Ikŋak zempeme dapmelaŋge tuŋguwinaŋ mamti mulup mimiyeleŋ msaye. Mulup annaŋ tototat zigok tagalenaŋ zet sekam ikŋak ikŋak ke zemâtâtât mulup omba penaŋ mge.

Zet ñotekŋaŋ temaŋ kapigogaŋ 1 Timoti zapat meluwaŋ keŋaŋ talip:

1:1-11 Zet yaŋbemti zenzeyelen zet

1:12-17 Pâlaŋ Kawawaŋgalen keŋ taoletnaŋ ekmagen wemsaye keyet zetnaŋ zeye

1:18-20 Yaŋaŋ eneyet aŋkeŋoo zet ke zemâge

2-3 Dapmelaŋge indikdamuŋ mimiyeleŋ zemâtâtât zet

4 Ekŋen am zemyuŋguŋgu omba mamip ekŋenmak set zigoset zemusuwewet mimiyeleŋ zet

5:1-6:2 Am mange ikŋak ikŋak dapmelaŋge kwepgat tuŋguwinaŋ talip ekŋenmagen mulup mimiyeleŋ zemâtâtât zet

6:3-19 Mama mimi yuŋguŋguŋaŋ omba weyaŋgalenaŋ zemâtâtât zet

6:20-21 Zet zemdeleŋ zenze zet

1 ¹Kawawaŋ Aŋgalalaŋŋ ma Zisas Kilais egat nin mawebenup. Egat mulup an neŋ mamti egalen Zet Zapat Dolakŋaŋ Penaŋ zempalakŋaŋ bembeyelen nâmti nakumtetiwin.

²Timoti, neŋ gâgât meluwaŋ kapi kumgayap. Geŋ nâmkîŋpepeen nemun penaŋ benik. Kogogapmti Kawawaŋ Bipm ma Zisas Kilais ningat Amobotnaŋnnaŋgalen keŋ taolet ma aŋgalaŋgogot ma keŋ sewakŋaŋ geŋmak tatagalen nâmti dunduyap.

Pâlaŋ Timotiyet zet kilom zemyuŋuŋgu an ekŋengat ekseseyet zein

³Âpme neŋ Masedonia msalen mesât mti kapigok apitilim gewan, “Geŋ Epesa tati am notnaŋ am zet katnaŋ dâsuki sakam igak igak tadiindop ekŋen ke zemkulumindewanik.” ⁴Geŋ ekŋen bemzet dâsuki ma gulugalakŋineyet kwilin etaŋ omaiŋ maiŋ tapmip ke penaŋepiŋ keyepmti zemkuluminde. Set keboŋ keyaŋ Kawawaŋmagen nâmkîŋpepeyet setnaŋ ku manzuluzin. Âmandanda setnaŋ etaŋ manzuluzin. ⁵Neŋ golaŋ zet yaŋaŋ kapigok in mimiyet nâmti zeya, in gogot dopdop mbep. In gogot ke keŋ kwetetepmanengatnaŋ kobe ma nânâŋin kileŋ mamaip kemagengatnaŋ yek ma Kilaismagen nâmkîŋpepe tuwat tuwat palen mamaip kemagengatnaŋ ku kobe. ⁶Am notnaŋ ekŋenaŋ zet zeyap ke bamkumpemti selin myuŋuŋpemti kopa zelen gwidikbien. ⁷Ekŋen zii zet Mosesiyaŋ Kawawaŋmagen titiŋaŋ keyelen an zikat indanda igagen kwakwagalen mamip keyaŋgut ekŋenaŋ zelin tazeip ke yaŋaŋ ku nâmti keyet windeŋaŋ mamip.

⁸Yaŋgut nin nânup zii zet teŋ mamâti mip beme keyaŋ dolakŋaŋ mambein. ⁹In pigok penaŋ nâit, zii zet sambe kewan am teŋgat yek. Kelak am zii zet ku mamâlîp ma am keŋ katik ma Kawawaŋgat ku manâme mozin ma ayomtoŋ ma am esesinpiŋ ma Emetak Teŋ ku mamâlîp ma am mambiwine maindome gakip ma am notnaŋaŋ am sambe maindome gakip, ¹⁰ma animbi set kileŋ mama ma anaŋ anaŋaŋ timambet wewe ma imbiyaŋ imbimak timambet wewe ma amnaŋ am nolin kambutiti ma am dâsukitoŋ ma am nolinangat zet dâsukiyet zemkatikbembe ma Kilaisiyelen dâpmelange mama mimiŋinaŋ zet katnaŋ penaŋ tazin ke ku mamâlîp ekŋen keyelen. ¹¹Zet katnaŋ penaŋ am zikat indandayelen ke ilak Zet Zapat Dolakŋaŋ Penanen Kawawaŋaŋ mamsokbein. Ke Kawawaŋaŋ neŋ zempalakŋaŋ bembeyelen naŋge. Zet keboŋ keyaŋ Kawawaŋ pembenangat windeŋaŋ dolak dolakŋaŋ keyet sesewatpepeyelen diindom zikat ndamamm.

Pâlaŋ Kawawaŋgat pembenangat wisikŋ zein

¹²Neŋ mulupmnangat winde Kilais Zisas Amobotnaŋnnaŋ manaingapm wisikŋ penaŋ zeyap. Egaŋ neŋ mulupmaŋ ke ŋep mbap e nâŋgeyepm name mulupmaŋ ke mamiyap keyepm egaŋ neŋ ombemnenge. Neŋ keyet wisikŋ zeyap. ¹³Neŋ penaŋ egat eweŋaŋ ku nâmkîŋpemti egat bekanŋaŋ zewan ma amŋane sisipeŋpeŋ mimindewan ma kwelat kumpemti kwileki tapmiyap ke ku nâmtiyepm mbanangut Kawawaŋaŋ neŋ aŋgalaŋ

gogot mnenge. ¹⁴Kogok tapmnepepe ma ningalen Amobotnaŋ ek neŋ keŋ taoletnaŋ bemisisiknaŋmak bem mnemti nâmkînpepe ma gogot mimi keyet yaŋaŋ Kilais Zisasmagen tusemnenge. ¹⁵Zet kapi penaŋ sukwepe keyepmti neŋ manâyawen am sambeyan kapi nânâyelen Zisas Kilaisiyaŋ msalen toti am yom toŋaŋ nin timkwatndeye. Ninmagengatnaŋ nâgât yomnnaŋ am sambe sebemindein. ¹⁶Keyangut Kawawaŋaŋ nâgât aŋgalaŋ gogot mge ewan Kilaisiyaŋ neŋmagen mulup mge e sepsepnok keyepmti am yomtoŋ ekŋenaŋ ke ekti nâwep ek an sewaknaŋ. Kogogapmti notnaŋaŋ nepe kapi nâmti mama kanzizit Kawawaŋmagen tiwep. ¹⁷Mama katiknaŋgalaŋ Amobotnaŋ ku gakikiyelen ma amnaŋ nepe ku gigigalaŋ. Geŋ Kawawaŋ kwewetaŋ mamani. Amnaŋ Geŋ eksemgemti sesewatgepeŋ mamti mamambep. Ke penaŋ sukwepe mgaŋgayelen.

¹⁸Timoti, nâmkînpepeen nemun benik keyepmti neŋ apitilim gesowap kapi mbanik. Ewenan geŋ Kawawaŋgalaŋ anaŋ muluwen gesâti ekŋenaŋ gâgât Zet Zapat Dolaknaŋ Penaŋ zemkawaŋ bembeyelen Emetak Teŋaŋ nâmbiliwepme weme ombemgeye keyet zemgwatnaŋ mgewien. Keyet Amobotnaŋgalaŋ muluwen geŋ zedaŋ an kasayen dolaknaŋ maâin keboŋ bemti âwanik. ¹⁹Mti nâmkînpependi katiknaŋ bemti tapme keŋdi damuŋ mmane kwetetepmaŋ tabe. Am notnaŋ ekŋenaŋ keŋin damuŋ mme kwetetepmaŋ ku tage keyepm nâmkînpepeŋin kwalepme delaŋ zeme kileŋ mekobien. ²⁰Ekŋenmagengatnaŋ an zut Aimenias ma Aleksandia egelaŋ sepem kekok mbun. Egelaŋ ŋoktik dolaknaŋ kapigok ku tiwungapmti neŋ eget Sadangat betnan bemidema nuknaŋ omba idame keyan idamukulem mme egelaŋ Kawawaŋgat zet kwelat ewe ku kuwalup.

Sesewatmak mamayelen zet

2 ¹Zet neŋ mobotnaŋ penangat neŋ apitilingeyap e pigok: Geŋ an nâmkînpepeŋinmak ekŋen diindomane ekŋenaŋ am sambeyet nâmti Kawawaŋgat kwileki neŋgat teŋ dunduwepe ma dundundu temakwep mbep. Ma yaŋkwesisieset ma wisikŋeset bemti Kawawaŋgat dundum sawep. ²Msatgalaŋ amobotnaŋine ma am notnaŋ mundum temanen talip ekŋenaŋ nin ndadamuŋ mme nin sewaknaŋ ma mamasi palen mamti Kawawaŋ eksempemti am sambeyan mama mimi dolaknaŋ mamnupgat dundum sawanup. ³Kegok mamnup keyan Kawawaŋ Aŋgalaŋ egan keyet nâme dolaknaŋ ma nepe bein. ⁴Kawawaŋaŋ am sambe iŋnaŋgalaŋ zet katnaŋ penaŋ ke nâmtâtâgalaŋ manâin ma Egan am ekŋen bekananinaŋgatnaŋ aŋgalaŋindendeyet manâin. ⁵Kawawaŋ kwewetaŋ mamain. Mti Kawawaŋ ma am ningat tuŋgupmnan an kwep Zisas Kilais ek an sek tiyeyan mamamndain. ⁶Kawawaŋaŋ am sambe ndaŋgalaŋgalaŋ nâŋge ke msokbembeyelen kanaŋ penaŋ kopme Kawawaŋaŋ Zisas Kilais am sambe yomengatnaŋ ndatitiyelen

ketalasimpeme koge. ⁷Neŋ yaŋaŋ keyepmti Zisas Kilais egalen mulup an neŋ mamti egalen Zet Zapat Dolakŋaŋ Penan zempalakŋaŋ bembeyelen ma zikat indanda mamayet nâmti zemnemti am Zuda mangeen ku sokbemberaŋ zet penan ŋotekŋaŋ indandayet ma nâmkĩŋpepeyet nâmti zenewien. Zet ke dâsuki yek; neŋ penan sukwep zeyap.

⁸Keyepmti neŋ am Kawawaŋgalen mulupgat keŋin bemberaŋ ekŋengat pigok nâŋap, ekŋenaŋ zet zapat pembenangat ondedagen belin time mopme dundusâti nolinangat ŋenzinziŋ ma zekaŋkaŋ mee bamkumpemti dunduwep.

⁹Ma imbi ekŋengat kegogak pigok nâŋap, ekŋen sâk melakandu pembenan miak bewangut ego egoŋaŋmak yek weyaŋti miak bep. Ma ŋok sepem yaŋaŋ yaŋaŋ igak sek mmobotgat ku elengewep. Ma elemiak tosaŋaŋ mobotnaŋ golaŋ weyayaŋaŋ mee ku miak bep. Ma sâk melakandu tosaŋaŋ temaŋaŋaŋ kwititiŋaŋ sek mmobotgat ke ku miak bep. ¹⁰Imbi Kawawaŋ masesewatpeip ekŋengat mama mimiŋin elimiak pembenan keboŋ mti mamayet nâmti zeap.

¹¹Imbi ekŋenaŋ buzak mamti damuŋ ekŋenmagen mulup zigok mimiyet yaŋaŋ mnâmti ekŋengat kandaŋinan mambep. ¹²Neŋ imbi notnaŋ ekŋenaŋ zikat indanda mulup mimiyet ma imbiyaŋ angat mobotnaŋ mamayet ku nâmindeyap; ekŋen buzak tati nânâ etaŋ nâmbep. ¹³Kawawaŋaŋ Adam kukŋangat mge bam Ewa mme sokbeye. ¹⁴Adamaŋ Kawawaŋgalen zemkatikbembe ke nângeyaŋgut tetimae toŋaŋ imbimageset koti tetimideye ke sukŋaŋ bemti Kawawaŋgalen zet kuluye. Mme imbiyaŋ tetimaemae tongalen zet nâmti yom mge. ¹⁵Keyet Kawawaŋaŋ nâme ŋep beme imbi nâmindame nemba ambebelinan ekŋenaŋ nâmkĩŋpepeŋinmak ma gogolinmak keŋin kwetetepmaŋ ma weyaŋti mambep enenogat ekŋenmagangatnaŋ An Anŋalalaŋ ke sokbembeyet zenzeŋaŋ.

An dapmelange ŋeŋaŋ bembe ekŋengalen zet

3 ¹Zet kapi penan. An ŋenaŋ dapmelangeyelen ŋeŋaŋ bembe kwasâgât nâit beme egaŋ mulup pembenan penaŋgat nâin.

²Âpme dapmelange ŋeŋaŋ bembe ekŋenaŋ myuŋguŋgupiŋ mamti imbi kwewetaŋmak mambe. Egaŋ ŋoktik dolakŋaŋ etaŋ mâti mama mimiŋaŋ damuŋ mbe. Am sambe eksempewep. Egaŋ am mamananan notn mimindemti mkaŋan indewe. Mti an zikat indanda dolakŋaŋ penan mambe. ³Egaŋ tu katikŋaŋ omba nimti keŋ kileŋ ku mbe. Egaŋ keŋ kasa sakwep ku mbe. Egaŋ zekaŋkaŋpiŋ; keŋ sewakŋaŋ palen mambe. Egaŋ mânepmak bembeyet keŋaŋ temaŋ ku tabe. ⁴Egaŋ imbi nembaŋane ŋep weyaŋ indikdamuŋ mimindewe. Mti nembaŋane indamusuwet indeme ekŋenaŋ zetnaŋ gawepumti dolakŋaŋ eksempewep.

⁵An egaŋ imbi nembaŋane ŋep ku maweyaŋindikdamuŋ min beme ek Kawawaŋgalen dapmelange ekŋengat ŋeŋaŋin tati ŋep ku indikdamuŋ

mbe. ⁶An nâmkînpépe alakñaŋ tususuŋaŋ egaŋ dapmelaŋgeyelen an ŋeŋaŋ ŋep ku bembeyet mneti egaŋ sek mmobot omba min beme ek Sadangaŋ zet zemdelanŋpepe mimiŋaŋ kegogak egaŋ keyet palen mowebe. ⁷An ke am sambe dapmelaŋge ku bemberaŋ ekŋenaŋ eksempewep mneti ektakalimti Sadangaŋalen aŋkapipilen kume Kawawaŋgalen kwit zapaŋnaŋ towembemagengat.

An damuŋ dolakñaŋ ekŋengalen mama mimiŋyelen zet

⁸Dapmelaŋgeyelen damuŋ ekŋenaŋ kogogagak mama mimiŋin dolakñaŋ mamambep ma mamaŋinaŋgat ekseŋeŋmak mbep ma ekŋenaŋ wain omba ninipin ma mânepgat eiyakgaleset mulup ku mbep. ⁹Ekŋenaŋ Kawawaŋgalen zet katnaŋ penaŋ zemkawaŋbemberaŋ ke keŋ zutpin atam tabep. ¹⁰Ekŋen ke kukñaŋgat yaŋin mekme teŋ mamaŋgut indeme damuŋ mulup mbep.

¹¹Imbi damuŋ ekŋenaŋ kogogak mama mimiŋin dolakñaŋ mamambep ma ekŋenaŋ zekukuŋinpin mamti ekŋenaŋ ŋoktik dolakñaŋ etaŋ mâbep. Ma kwitnaŋ kwitnaŋ nâmsemtet mamip.

¹²Dapmelaŋgeyelen an damuŋ ekŋenaŋ imbi kwep esemtet wabep. Kegok mti imbinembaŋine ŋep weyaŋti indikdamuŋ mbep. ¹³An damuŋ ekŋenaŋ mulup dolakñaŋ mbep katan kwilin mwapme windemak tati Kilais Zisas nâmkînpépeŋin ŋep sosok zemkawaŋ bewep.

Nâmkînpépeyelen zet katnaŋ penaŋ

¹⁴Neŋ koti gigigalen nâŋap ya ku kolap beme meluwaŋ kumgayap kapi makuwanik. ¹⁵Keyaŋgut sakwep ku kobap beme meluwaŋ kuyawen kapi makumti am nâmkînpépeŋinmak zigok mamayelen ke zemâtâtindawe. Nin Kawawaŋgalen nemunamba manŋe keyet butnaŋ. Manŋe keyaŋ Kawawaŋ mama toŋaŋ egalen dapmelaŋge temaŋ ke Kawawaŋgalen zet katnaŋ penaŋ ke bandim mti ekdamuŋ mamin. ¹⁶Zet katnaŋ ekŋen kapiyaŋ ningalen zet enzilim tazin ke alak msokbemkawaŋ bein:

Egaŋ an penaŋ sosok sokbemkawaŋ beme am sambeyaŋ ekbien.

Emetak Teŋaŋ egalen yaŋaŋ sosok penaŋ mkawaŋ bemti zeye, “Kilais ek an teŋ toŋaŋ penaŋ.”

Âpme ensel ekŋenaŋ ekbien.

Manŋe katan am sambeyaŋ kwit zapaŋnaŋ mepmâpme nâmpbien.

Msalengalen am sambeyaŋ ek nâmkînpemâbien

ma Kawawaŋaŋ kululuŋen busatnaŋ keŋaŋ tetimoge. Nin zet keyet keŋ zutmak ku mnup. Nin nânuwen zet ekŋen keyaŋ penaŋ sukwep bein.

An zemyuŋguŋu notnaŋgat zet

4 ¹Kawawaŋgalen Emetak Teŋaŋ alak pigok zemâtâti manzein, “Bam am notnaŋaŋ nâmkînpépe peme tapme ekŋenaŋ zet we

bekanaŋmagengatnaŋ gawepumti ekŋengalen zet yuŋgu yuŋgu ke an zemyuŋguŋguyelen keŋinan beme am keŋin omba mamyuŋguip.”
²Zemzikat indanda keboŋ ke an dâsukitoŋ ekŋenmagengatnaŋ. Ekŋenaŋ, “Nin zikat indanda dolakŋaŋ mamnup” manzeiwaŋgut ke penaŋ yek. Yominangat sakambuk ku mamip ma keyaŋ mme keŋin gakikiŋaŋnok maip. ³Am ekŋen keboŋ keyaŋ Kawawaŋgalen dapmelangeyaŋ awembiŋ bemti Kawawaŋmak tâtâŋin tazin ke mme mgasik bewe zemti manzemzikat indaip. Ma Kawawaŋaŋ meu zeme sokbeye ke am nâmkîŋpepemaŋaŋ wisikŋ dundum samti nimti zet katnaŋ penaŋ ke nâmtâtâtâgat zeme sokbembeŋaŋ ke ekŋenaŋ meu ke ku niniyet manzemkulumindeip. ⁴Kawawaŋaŋ kwitnaŋ kwitnaŋ sambe mme sokbeye ke pembedaŋ etaŋ. “Mgasik,” zemti ku peme mebegalen. Ŋenaŋ kwitnaŋ kwitnaŋ tim nsâti Kawawaŋgat wisikŋ zemti nimbe. ⁵Enenogat kwitnaŋ kwitnaŋ sambe ke Kawawaŋaŋ zetnaŋaŋ zeme sokbeme ekme dolakŋaŋ beme ikŋangat zapat nâmindeyeyet nin timnsâgât wisikŋ zemti dundumsawanup.

⁶Geŋ zet zemâtâtât timti mâpmanik ke am nodine nâmkîŋpepemak ekŋen diindowanik beme geŋ Kilais Zisasiyelen mulup an penaŋ bewanik. Kegok mti giti kogak nâmkîŋpem manik ke giŋgiŋ mbanik ma an dapmelangeyelen zemâtâtât mam indanik. Zet katnaŋ tiwananen ke ewe nânâ mulup mamambanik. ⁷Kegok tati bem zet ke zet katnaŋgat kasaŋaŋ penaŋepiŋ ke bamkumpemti keŋgaleset keyet mulupmaŋ mmamoti nâmkîŋpepe dolakŋaŋmak mama ke mmambanik. ⁸Segeset pembedaŋ tatatgalen titok titok mambutenup ke zawatpiŋ mamayelen mamnup ke ŋewaŋgut keŋ butemti nâmkîŋpepeen kaliŋaŋ bemti mamayelen set ke ma ke mimiyeŋen ŋep penaŋ. E eneyet egaŋ penaŋaŋ alak msalen kapi maaiknup ma bamgat penaŋaŋ kogak aikbanup. ⁹Zet kapi penaŋ sukwep penaŋ. Ke am sambeyaŋ ilindiŋ ŋep nâmti nâmkîŋpepeyelen. ¹⁰Nin webembenn Kawawaŋ mama toŋaŋ ma Aŋgalalaŋ Anmagen tazin. Ma am egat manâkiŋpewen yomengatnaŋ matimkwatindein. Nin keyet nâmkîŋpemti sek sindem palen mulup katikŋaŋ penaŋ mti mimiek mamnup. ¹¹Geŋ zet zemâtâtât sambe zemâtâtgayap ke am zemzikat indamane nâmbep.

¹²Geŋ pemane an ŋenaŋ gâgât an zomolim zemti mtogengepiŋ. Yek, geŋ an imbi nâmkîŋpepemak sambe ekŋengat ŋeŋaŋin ma zikat indandaŋin bemti zet zenzendi ma mama mimindi ma gogot mimindi ma nâmkîŋpependi ma mama kwetetepmaŋ mamandi keyaŋ sosok tapme ekbep. ¹³Geŋ nâgât damuŋ damuŋ kan mambaniknok ke windeŋaŋ Kawawaŋgalen zet dapmelange makumindawanik ma dindom zikat mimindawanik. ¹⁴Kawawaŋgalen an ŋeŋaŋ belin ŋokdan bemti Kawawaŋgalen zet zempalakŋaŋ bembeyet zemgewien. Mulup ke ku pemane towembe. ¹⁵Geŋ kan kataŋ wisatpiŋ ke tati mulup alak zeyap

ke kakanemuŋ mbanik. Kogok mmame mulup mimindangat penanŋ sambeyan sosok ekmâtâbep. ¹⁶Geŋ gitangat mama mimindi weyanŋi damuŋ mbanik ma am zikat indandandi kogak weyanŋi damuŋ mbanik. Kan katanŋ geŋ kwileki ke giŋgiŋ mti mbanik. Geŋ kogok mbanik beme ku walebaniŋ geŋ mama kanzizilen kwabanik. Mame am zedi manâiwanŋ kogogak ku walebep ekjenanŋ mamaen kwabep.

Am mama mimi kapigoset indatimambep

5 ¹Geŋ ailip ŋen tetim mesât zet ŋenzinziŋ ku msawanik. Geŋ zet sewak sewakŋaset bipdanŋat zeweknok dunduwaniŋ. An sipkotem ekjen kogak dapmeniŋ katnanen indatim mambaniŋ. ²Imbi ilip ekjenŋat kegogak mamne zemti sewakŋaset diindowanik ma imbi sipkotem ekjenŋat kogak ipmne zemti keŋ kwetetepmanen tejeset indati mambaniŋ.

Dapmelangeyan imbi kwambet indikdamuŋ mbep

³Imbi kwambet penanŋ nemunambaŋinepiŋ ekjen ke eksem indewaniŋ. ⁴Âk imbi kwambet ŋen ek nemunambaŋane ma iŋsokŋaŋne talip beme ekjenanŋ kukŋangat mukulem ekmagen ma ilinangat mambiwinemagen mbep. Mama mimi sepem keboŋ keyet Kawawaŋanŋ nâme dolakŋanŋ mambein. ⁵Âpme imbi kwambet keyanŋ igak mame am ŋenanŋ ekdamuŋ ku mamm egaŋ webembeŋanŋ Kawawaŋmagen bemti tambu msa katanŋ dundunduyen mukulem mpepeyelen mayanŋkwesin. ⁶Âk imbi kwambet ŋenanŋ ikŋangat sekŋangat tikŋanŋ mamâzin elak alik mainangut keŋanŋ eweŋanŋ gakikiŋanŋ. ⁷Zet kapi imbi kwambet ma nemunambaŋine zemâtâtindame weyanŋi mamme am ŋenanŋ ku zemkwelat mimindawep. ⁸Âk ŋenanŋ ikŋangat sipbutnanŋ ma mamnotnane ku indikdamuŋ min beme egaŋ nâmkinpepenanŋ iyanŋi am nâmkinpepepiŋ ekjenŋalen bamen tototnanŋ penanŋ bein. ⁹Imbi kwambet kwilin kilom timti kwambet manŋeen tususupiŋ. Imbi kwambet ekjen kabonŋ kapi indikdamuŋ mbep. Kwambet keyanŋ an kwewetanŋ wawatnanŋ ma nup kananŋ 60 bein ¹⁰ma mama mimiŋin notnanŋ kapigok ekbep. Egaŋ nemunambaŋane weyanŋi indatim mamkwage. Ma am mamanananŋ indameti mka indaye. Ma sekŋanŋ mtoti dapmelange nâmkinpepeŋinmak notnangat mulup mge. Ma am nukŋanen tapme mukulem mimindeye ma mulup notnanŋ pembenanŋ keŋanŋ keyet bemti mamkwatan. Imbi kebonŋat ekbep. ¹¹Âk imbi kwambet sipkotem egaŋ kwilin dapmelangeyanŋ indikdamuŋ mimiyeleŋ tususupiŋ. Mame ekjenanŋ aimbiŋ bembeyelen tikŋanŋanŋ mandame an wati Kilais bamkumpewepgapmti ¹²ekjenanŋ ekmak kukŋangat tâtâ mbien keyepmti yommak bewep. ¹³Ekjenanŋ kogak kan walaletgalen yanŋanŋ mnâmti mka ŋengatanŋ mka ŋen mamotolip. Kegok etanŋ yek, ewe mme bekananŋ beme dekuku mimi ma nenn nâyanŋ nâyanŋ an damuŋnok mulup

zet manzeip. Ma ekjenan zet ku zenzeyelen ke manzeip. ¹⁴Keyepmti neŋ nâma imbi kwambet sipkotem ekjenan awembiŋ bemti nempa indambeti apnembaŋine ma mkanjin ekdamuŋ mmambep. Kogok mti weyaŋ mame am notnaŋ nâmkijpepepiŋan ningat kwelat ku kuwep. ¹⁵Eneyet imbi kwambet notnaŋ ilak set pembedaŋ bamkumpemti Sadan mâbien. ¹⁶Keyepmti dapmelaŋge imbi ŋenmagen imbi kwambet notnaŋ egat apnembaŋanemak maip beme egaŋ indikdamuŋ mbe. Âpme dapmelaŋgeyaŋ ekjen keboŋgat nukŋaŋ pupu yek. Imbi kwambet ŋen igak penan main keboŋ etaŋ indikdamuŋ mbep.

Dapmelaŋgeyaŋ damuŋine indikdamuŋ mbep

¹⁷Âpme an damuŋine muluwin dolakŋaŋ mamip ekjen keyet nâmindeme mopme an ŋenaŋ Kawawaŋgalen zet zenze main ma an zikat indanda nâmti weyaŋ indikdamuŋ mti eksemindewep. ¹⁸Kawawaŋgalen Zet Itnaŋanen meluwaŋ mimiŋaŋ kapigok tazin,

“Makau apmaŋaŋ wit imenzaŋme katnaŋaŋ bululuŋ zem totogalen mulupmaŋ tapmti meu nsâpmme kaŋgalemaŋ bekekekpiŋ.”

(Zii Zet 25:4)

Ma sepem kogogak mulup anaŋ tosaŋaŋ ŋep titiyelen. ¹⁹An ŋenaŋ an ŋenaŋgat ŋeŋ beluŋ beluŋ zet ombem zeme nânâpiŋ. An zut ma tuk ekjenan zet sakam kwep zemti bandim mme nâme penan bewe. ²⁰An ŋenaŋ yom mme geŋ am notnaŋ ekjenat zikalinan zet msamane an notnaŋ ekjenan ekti kiŋgabep.

²¹Kawawaŋ ma Zisas Kilais ma enselŋene ekjenat zikalinan dindomti ingat zemâtâtât kapi mâti ken ke ken ke ma notn notn katnan betetnaŋ ku mbep zemti diindoyap.

²²In am Kawawaŋgalen mulup an winde indandayelen belin ŋokŋinan bembeyelen abak abak ku mbep. In am yaŋin nâmtâtâtâtpiŋ mneti ilin yommak bewepgat eksemti kwetetepmaŋ mambep.

²³Âpme geŋ sek zawat susuk mpeŋ mamnikgapmti tu etaŋ ninipiŋ; wain isikŋaŋ kambakdi mukulem mimiyeleŋ ŋep nimbanik.

²⁴Âpme am notnaŋgalen yomin ŋep sosok eegalen ma yominangat dopmaŋ mutumindandayelen sosok matazin. Yangut am notnaŋgalen yom bamgat zemdelan zenze kanen sokbeme ekbanup. ²⁵Sepem keboŋagak mama mimi dolakŋaŋ sosok ŋep eegalen, ma notnaŋ sosok penan ku eegalen ke tetak ku enzilim tabe.

Sisiliŋ an nâmkijpepemak ekjenalen zet

6 ¹Am nâmkijpepemak sisiliŋ etaŋ mamip ekjenan an mobotnaŋinangat nâme pembedaŋ beme mobotnaŋ talip nâmti eksemindewep. Kogok mme am ŋenaŋ Kawawaŋgat kwizet buŋamaŋ ma Kilais nâmkijpepeyeleŋ zetnangat ku zeme tobe. ²Ma an mobotnaŋin

ekjen nâmkijpepejinmak zemti keyet sisiliŋ mulup an ekjenan ku mtotindewep. Eksemindemti ekjengat mulup msâgât ekme nolin nâmkijpepeen tazin nâmti sek bulâlân mulup ku mbep. Sisiliŋ an in an mobotnanjin Kawawaŋan nâmtikŋan miminden ekjengat in muluwin windeŋanbeŋ mbep.

Mânep milawatgat eyak ku mbep

Zet zeap kapi zemzikat mimindamti kejin buteme ke mâti mbep. ³An ŋenan nânâ sakam igagen tazikat indain ma Amobotnanj Zisas Kilaisiyelen zetnan penan ke nâme ŋep ku bein ma mama Kawawaŋan nâme dolakŋan mambein zet ke zikat indandaŋan ku mâzin ⁴an ke belak sekŋan etaŋ mamimozin ma an ke nânâŋan bugan ku tazin. Keŋanen kwitnan kwitnan bekaŋan misik tazin. Egaŋ zet mdândândâ ma zet yaŋan zem guluk gilik omba mamm. Zet mdândândâyelen keboŋ keyan penan kapigok mamsokbein: keŋ kuku mimi, atindândâyet setnan kabembe ma am nolin ŋeniyet manâmbekambein ma an notnaŋgat kwelat makun ma ⁵an ekjen keboŋ ke zet mmot mtot mti kejin yungume delaŋ zenzeŋan ma nânâŋinpin penan ekjenan zet penan bamkumpewien. Mti nâme Kilaisiyelen zapalaŋ mânep milawat sokbemndasem zemti mamip.

⁶An ŋenan mamaŋanen Kawawaŋan mama mamayelen manâin ke mâti mezin beme keyan mânep milawatmak mama keyan sebempein. Ekmagen zigok tasain kelak ŋep kemak. ⁷E zigogak? Nin msalen talak kobenn ya nan mane mesât belak betn mobeŋbeŋ mebanup. ⁸Kegok keyepmti nin meu ma sâk melakandu tatndain beme keyan nnaŋgat sepem ŋep bein. ⁹Âk am ŋenan milawatmak omba bembeyelen manâiwaŋ tetimaemaen sukŋan beme Satangalen kapipilen maindon. Âpme kejin kwilekiki bekaŋan ma waleletnaŋmak keyet tikŋan bemisikti keyan indamandame walelet kaliŋan metobep. ¹⁰E eneyet mânepgat keŋ omba bembe ke yom notnaŋgat ŋotekŋan. Notnan ekjen ke wemindandayelen omba nâmti nâmkijpepejin katikpeme kilom mekogeyan bamgat keŋ sindem ma nukŋan omba aikindaye.

Pâlaŋ Timoti mama kanzizitgat yaŋan zemzikat sain

¹¹Timoti, geŋ Kawawaŋgalen an mamanikgapmti kwitnan kwitnan keboŋ ke eksempemti kunzun mebanik. Geŋ teŋ mama ma Kawawaŋgalen mama nâmtikŋan mnen ma nâmkijpepemak mama ma gogotmak mama ma katikŋan bemti tatat ma sewak palen mama keyet giŋgiŋ mbanik. ¹²Mti nâmkijpependaŋat mulupmaŋ windeŋan bemti mbanik. Kegok mmeti giti mama kanzizit tiwanik. Mama mimi kabon kapiyet Kawawaŋan gakumtetime geŋ nâmkijpependi am sambeyet zikalinan zemkatik bemane nâmbien. ¹³Kawawaŋ kwitnan kwitnan

sambe mamañin maaikindain egat zikatnan ma Zisas Kilais egan Pontias Paillet egat zikatnanen kingagapiñ ikñangāt yañan penan zemkatik beye. Egat zikatnan geñ kapi mimiyet zemkatik beyap. ¹⁴Ke geñ nen zemgeya ke gawepumti mammopmane nnañgalen Amobotnan Zisas Kilaisiyan gilik zemkobe. Gawepumti tapmopmane am ñenan geñmagen keyet yoman ñen aikiñ mbe. ¹⁵Kawawañan kanan beyeyan tazin kan beme Kawawañan Zisas sosokpeme kobe. Geñ Kawawañ am sambeyan sesewatgewep ma geñ kwep winde toñan ma ñeñan sambeyet ñeñanin ma amobotnan sambeyet Amobotnan. ¹⁶Geñ kwewetan gakikipiñ busatnan teman keyet keñan mamaniñ ke am ñenan mebegalen yek. Geñ an ñenan ku giga ma ñep ku gigigalen. Amnan nâmgeme mobotnan bewe ma winde gangañan ewe wemgamti wemobe! Keyet nâmti dundunganup. Ke penan.

Am mânep milawalin teman ekñengalen zet

¹⁷Msalen am mânep milawalin teman mamaip ekñen sekñin ku mobotgalen diindomane ekñenan webembe mânep milawalin waleletgalen keyet ku bewep. Ekñenan Kawawañan kwilekiki kwapem matalasimndame oloñen palen matimanup ekmagen webebeñin bewep. ¹⁸Mti zemindemane mama mimiñinan kwileki pembenan ke mbep ma mama mimiñin dolakñan keyan semem mopme ekñenan kwileki ke ma ke omba indawep ma am eleñ beleñ bemti mukulem mukulem mimindewep. Mama mimi dolakñan ke ekñenan mânep milawalinok timti mambep. ¹⁹Sepem kegok mti ekñenan Kawawañan kwitnan kwitnan tosa teman bamgat timambep keyan luanan katikñan penan weyan bewep. Kogok mti keñinan ñep mama penan penan mammnup ke nâmtâbep.

²⁰Timoti, geñ Kawawañgalen zet katnan gaya ke yayan kakanemuñ ekdamuñ mti mbanik. Mti am notnan ekñenan kwelat zet ma zet penanpiñ ke timamti kwitnan, “Nânâ teman,” manzeip ke dâsuki keyepmti geñ bamkumpewanik. ²¹Am notnan ekñenan zet keboñ ke toñan bemti nâmkipepeyet set tageen myungumti set belakñaset mebien. Kawawañgalen keñ taolet inmak wemti wembe.